

Naqqiut

Siunnersuut 18. maj 2020-meersoq taarserpaa
(Makku naqqiutigineqarput: akissuteqaat naalisarneqarpoq.)

Nunat avannarliit killiit akornanni inuusuttut piffissami aalajangersimasumik killilikkami aalajangersimasumik akikitsumik akeqartillugu angalasinnaangortillugit aaqqissuussinermik "interrail'itut" ittumik pilersitsisinnaanermik – imaluunniit allatut assersuutigalugu angalanermut tapiissutinik legatinik pilersitsinikkut nunat avannarliit killiit inuusuttunut ammaannissaannut periarfissanik misissueqqullugit Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni aamma Islandimi Naalakkersuisut kaammattorpai.

(Aallartitat siulittaasuat Vivian Motzfeldt)

Akissuteqaat

(Ineqarnermut Attaveqaaqatigiinnermullu Naalakkersuisoq)

Siullermeerneqarnera

Naalakkersuisuniit Aallartitat Siulittaasuat Vivian Motzfeldt, Siumut, aalajangiiffigisassatut siunnersuuteqarnerani qutsavigaarput.

Naalakkersuisut siunnersuuteqartoq tunngaviusumik isumaqatigaat, tassalu nunani killerni avannarlerni inuusuttut akunnerminni kulturit misigisariaqarpaat. Ataqaatigiinneq, suleqatigiinneq attaveqaaqatigiinnerlu nunat akornanni naleqartitani, nunat killeqarfii akimorlugit pitsaasumik attaveqaaqatigiinnissaq qulakkeerniarlugu attatiinnartariaqartuni pingaarutilittut inissisimapput.

Taamaattumik Nunat Avannarliit Killiit Siunnersuisoqatigiiffiata interrail-itut ittumik aaqqissuussinissaq pillugu isumassarsiaa suliniutaavoq pissanganartoq.

Kisiannili COVID-19-ip kingunerisaanik, Nunap Karsianut silaannakkullu angallassinermut aningaasaqarnermut sunniutit atuuttut erseqqissaatiginissaat Naalakkersuisunut pingaaruteqarpoq.

Silaannakkut angallassinermi ajornartorsiorfiusumi akikillisaasiisarnerit atuutsinneqalernissaat aningaasassaqaartinneqanngippat, tapersiisarneq Nunap Karsiata aningaasartuuteqarnerulerneranik kinguneqartussaavoq. Kiffartuussinermut isumaqatigiissutit nutaat, kulturimut tapersiissutitut aningaasaliissutit imaluunniit angalanissanut aningaasaateqarfinnut akileeqaataassutissatut aningaasaliissutit assigisaalluunniit, kiisalu taakku allaffissornertai.

Piffissami ajornartoorfiusumi inuiaqatigiit aningaasaqarnerat eqqarsaatigalugu Naalakkersuisut ataatsimiinnermi matumani taamaallaat siunnersuutini aningaasartuuteqarfiusariaqartuinnarnik saqqummiussiniarput. Aaqqissuussineq interrail-itut ittoq pillugu siunnersuut misissuiffigineqassappat, aningaasaliissutissanik immikkoortitsisoqartariaqarpoq.

Siunnersuut pitsaasuugaluartoq, misissuinissamut ajornartoornerup qaangiunnissaata utaqqineqarnissaa Naalakkersuisunit inassutigineqarpoq.

Tamanna pissutigalugu siunnersuutip akuersissutigineqarnissaa, aammalu ajornartoorneq qaangiuppat suliniutillu ingerlannissaanut aningaasassaartoqalerpat suliassap aallartinneqarnissaa Naalakkersuisut inassutigaat.

Matumuuna aalajangiiffigisassatut siunnersuut Inatsisartuni suliassanngorlugu tunniuppara.